

Script of Evening Gojri News Bulletin 07 August 2024 at 1700

Hrs

ایوننگ گو جری نیوز بلیٹن مورخہ 07 اگست 2024

یوہ آکاشوانی جموں بے نصرت چودھری تے محبوب سلطانی تیں خبر سُنو۔ پہلاں خاص خاص خبر۔

- * 1. صدر جمہوریہ درویدی مُرمو نیوزی لینڈ غا 3 روزہ ور آکلینڈ پُجی گئی بے۔
- * 2. نائب صدر جمہوریہ جگدیپ دھنکڑ نے زور کہلتاں واں اج کہیو بے کہ بھارت 2 بہراں غے اندر دُنیا غی تیجی سب تیں بڑی معیشت بن جائے گی۔
- * 3. وزارت داخلہ نے اج آر آر سوین نانہہ پولیس غو ڈائریکٹر جنرل مقرر کیو بے جہیزا پہلاں ڈی جی پی جموں کشمیر غو اضافی چارج سنبھال رہیا تھا۔
- * 4. تے جموں کشمیر پولیس غا سکيورٹی دستاں نے جموں مانہہ یوم آزادی غی تقریب غا مقام ایم اے سٹیڈیم مانہہ حفاظت غو چارج سنبھال لیوے۔

خبران غی تفصیل نال پہلاں محبوب سلطانی۔

Prez Visit

صدر جمہوریہ درویدی مُرمو نیوزی لینڈ غا 2 روزہ دورہ ور اج آکلینڈ پُج گئی ہیں۔ 8 سال بعد کسے بھارتی صدر غو یوہ پہلو دورو بے۔ محترمہ مرمو اپنا دوروزہ دورہ غے دوران نیوزی لینڈ غا صدر تے وزیر اعظم سنگ دو طرفہ معاملان ور گل بات وی کریں گی۔ اس تیں علاوہ ویں ویلنگٹن مانہہ اک بین القوامی تعلیمی کانفرنس سنگ خطاب وی کریں گی۔ صدر جمہوریہ آکلینڈ مانہہ رہ رہیا بھارتی لوکاں سنگ گل بات وی کریں گی۔ تے منیو جا رہیو بے جے اُن گا اس دورہ سنگ تعلقات نانہہ مزید بہتر کرن مانہہ مدد ملے گی۔

VP PM Handloom

نائب صدر جمہوریہ جگدیپ دھنکڑ نے اج کہیو بے جے بھارت آن آلا 2 بہراں مانہہ تیجی بڑی معیشت بن جائے گو۔ اُنہاں نے مزید کہیو جے عالمی معیشت مانہہ بھارت اس ویلے 5 بڑی معیشت آلو مُلک بے۔ نوی دہلی مانہہ ہتھ کھڈی غا 10 واں بین القوامی تہاڑا ور منعقد اک تقریب غے دوران بولتاں واں جناب دھنکڑ نے کہیو جے مُلک ترقی کر رہیو بے تے یاه ترقی ہُن رُکن آلی نہیں بے۔ قومی معیشت غی وکالت کرتاں واں جناب دھنکڑ نے کہیو جے مُلک غی معیشت نانہہ بدھان واسطے اس غی ڈاڈی لوڑ بے۔ اُن غو مزید کہنو تھو جے قومی اقتصادیات سنگ مُلک مانہہ روزگا رغا موقع پیدا ویں گا تے اس غے نال نال کا روبا ری فروغ مانہہ وی خاصی مدد ملے گی۔ نائب صدر جمہوریہ غو مزید کہنو تھو وزیر اعظم نریندرمو دی غی طرفوں دتو گیو نعرو وکل فار لوکل تے ہتھ کھڈی غی پیداوار اس مہم واسطے خاصی اہم منی جا رہی ہیں۔ اُنہاں نے لوکاں ور زور پایو جے وے ہتھ کھڈی غی پیداوار نانہہ بڑا پیمانہ ور استعمال کریں۔ اس موقعہ ور جناب دھنکڑ نے سنت کبیر اعزاز تے قومی ہتھ کھڈی غا شعبہ مانہہ بہترین کا کردگی کرن آلاں نانہہ دتا۔ اس تیں پہلاں مرکزی وزیر گیری راج سنگھ نے وی کہیو جے ہتھ کھڈی غا شعبہ نے گرائیں روزگا ر تے پائیداری غا بابدہ واسطے بڑو کم کاج کیو بے۔ اُن غو مزید کہنو تھو جے عالمی ہتھ کھڈی غی تجا رت مانہہ بھارت غی 90 فیصد شراکت داری بے۔

Amarnath Yatra

پنج لکھ توں متا یا تریاں نے بُن تک شری امرناتھ جی غی پو تر گُفہ غا درشن کر لیا ہیں۔ اس ضمن مانہ مہارا آکاشوانی جموں غا نامہ نگار این گلشن رینہ نے خبر توری ہے جے 29 جون نانہ شروع ہوئی اس یا ترا مانہ بُن توڑی 5 لکھ 1 سو 5 یا تریاں نے بابا برفانی غی گُفہ مانہ حاضری دتی ہے۔ شری امرناتھ شرانین بورڈ غی طرفوں دتی جانکاری غے مطابق حالیہ بارش ہون توں بعد پہلگام آلا رستہ ور مرمتی کم کاج کیو جارہیو ہے تاہم یا ترا بالتال آلا رستہ ور جاری ہے۔ تے اس ضمن مانہ تمام تر انتظامات نانہ یقینی بناویو گیو ہے۔ یاہ یا تر 14 اگست آلا تہاڑے اپنا آخری مراحل مانہ داخل ہوجا نے گی جد بھگوان شیو غی چھڑی مبارک مہنت دپیندر گیری غی قیا دت مانہ پہلگام اندر یا ترا مانہ شامل ہو جا ئے گی۔ واضع رہ جے 52 تہاڑاں ور مشتمل یاہ یا ترا 19 اگست آلے تہاڑے سراون پرنیما غا موقع ور اختتام پزیر وے گی۔

Kousar Nag Yatra

چار روزہ تاریخی کوثر ناگ یا ترا تے چھڑی مبارک یا ترا نانہ اج سویرے روایتی جوش و خروش سنگ ریا سی توں بری جھنڈی دس غے روانہ کیو گیو ہے۔ اس یا ترا بارے تفصیل دیتاں واں تحصیلدار ریا سی سریش کمار جہیڑا یا ترا غا نوٹل افسر وی ہیں نے دسیو ہے جے حفاظتی تے دیگر انتظامات کیا گیا ہیں تے اُن غو مزید کہنوتھو جے کوثر ناگ نانہ سیاحتی مقام غے طور ور فروغ دین بارے کوشش وی کی جا رہی ہیں۔ تاریخی چھڑی مبارک تے کوثر ناگ یا ترا غا ماضی مانہ کامیاب انعقاد توں بعد اس سال وی بڑی تعداد مانہ لوک شرکت کر رہیا ہیں۔ کوثر ناگ کشمیر غا اوچا علاقہ مانہ احرہل چشمہ توں 30 کلو میٹر غی دوری ور واقعہ ہے۔

DC Poonch JJM

ڈپٹی کمشنر پونچھ یسین چودھری، جل جیون مشن غا مشن ڈائریکٹر، تے جل شکتی محکمہ غا چیف انجینئر نے ضلع پونچھ مانہ جل جیون مشن غے تحت چل رہیا کم کاج غو جائزو لیو ہے۔ اس جائزہ میٹنگ غے دوران بکھ بکھ سکیمان ور ہوئی پیش رفت بارے جانکاری حاصل کی گئی تے چل رہیا پروجیکٹاں نانہ ویلا سر مکمل کرن بارے وی کہیو گیو۔ اس ضمن مانہ مہارا ضلع غا نمائندہ انوبھاؤ مصری سنگ گل کرتاں واں جل شکتی محکمہ غا سپرنٹینڈنٹ انجینئر محمد تاج چودھری نے اس طرح کہیو۔۔۔ بانٹ۔

MEA Bimstec

مرکزی وزیر مملکت برائے خارجہ امور نے نوی دہلی مانہ پچھلا تہاڑے اک اجلاس غے دوران خطاب کرتاں واں کہیو ہے جے سی آئی آئی بمسٹیک غو کاروباری فورم نجی شعبہ غا اہم نمائندہ، پالیسی بنان آلاں، صنعت کاراں، تجارتی سرمایہ کاراں نانہ اک ہی جگہ ور لیان غو کم کر رہیو ہے۔ اُنہاں نے مزید کہیو جے یوہ وزیر اعظم نریندر مو دی غی ترقی غا ہدف غے مطابق ہے۔ جہیڑو ناصرف خواتین غا ترقی بارے بلکہ خواتین غی قیادت بارے ہے۔ اُن غو مزید کہنو تھو بمسٹک دُنیا غی 25 فیصدی آبا دی غی نمائندگی کریں۔ اُنہاں نے نوجواناں واسطے بئر مندی غی ترقی خاطر بھارت گا عزم تجارت تے سرمایہ کاری غے ذریعے علاقائی تعاون غی اہمیت ور وی زور دتو۔

یہ خبر تم آکا شوانی جموں تیں سُن رہیا ہیں خبراں غا باقی حصہ نال نصرت چودھری۔

MHA Appoints

وزارت داخلہ نے اج آر آر سوین نانہہ پورا طور ور جموں کشمیر پولیس غو ڈائریکٹر جنرل مقرر کیو ہے۔ جہیڑا پہلاں ڈی جی پی جموں کشمیر ہوتاں وان اضافی چارج سنبھال رہیا تھا۔ آکا شوانی جموں غا نامہ نگار نے اطلاع دتی ہے کہ آر آر سوین نے اس وقت ڈی جی پی جموں کشمیر غو اضافی چارج سنبھالیو وی ہے۔ وزارت داخلہ غا سیکریٹری غی طرفوں جا ری کردہ حکم غے مطابق جناب سوین نانہہ چارج سنبھالان غی تاریخ تیں لے غے 30 ستمبر 2024 توڑی یاہ اگلا حکم توڑی جموں کشمیر غا ڈی جی پی غا عہدہ ور مقرر کیو گیو ہے۔ جناب سوین جہیڑا اضافی خدمات نانہہ انجام دے رہیا ہیں ہُن باضابطہ طور ور چارج سنبھالیں گا۔

Security ID JK

پولیس غا سکیورٹی دستاں نے جموں مانہہ یوم آزادی غی تقریب غا مقام ایم اے سٹیڈیم ور حفاظت غی نگرانی شروع کر دتی ہے۔ آکا شوانی جموں غا نامہ نگار نے اطلاع دتی ہے جے خطہ مانہہ دہشت گردانہ حملان غا سلسلاں غے پیش نظر سکیورٹی وینگ نے پنڈال غی ذمہ داری سنبھال غے سکیورٹی بدھا دتی ہے۔ بہتر اقدامات غا حصہ غے طور ور سکیورٹی وینگ نے علاقہ غو کنٹرول سنبھال لیو ہے تے عام لوکاں غو سٹیڈیم غا احاطہ مانہہ داخلو بند کر دتو گیو ہے۔ گڈیاں غی جانچ پڑتال کی جا رہی ہے تے جن لوکاں کول سکیورٹی کا رٹ ہیں انہاں نانہہ ہی مکمل مکمل جانچ تیں بعد ہی سٹیڈیم مانہہ جان غی اجازت ہے۔

Search Operation

ضلع اڈھم پور غا اچیرا علاقہ مانہہ چھپیا وا دہشت گرداں با رے تلاشی کا روائی اج دوجے تہاڑے وی جا ری ہے۔ مہارا آکاشوانی غا نمائندہ نے خبر ثوری ہے جے بسنت گڑھ غا پتھی نالہ مانہہ فوج، پولیس تے سی آر پی ایف غی طرفوں سانجھا طور ور تلاشی کاروائی بڑا پیمانہ ور شروع کی گئی ہے۔ انگاں حفاظتی دستاں غی طرفوں ضلع راجو ری غی تحصیل کالاکوٹ غا دیار گالا جنگل مانہہ 2 دہشت گرد جن وچوں اک زخمی با رے سؤملن توں بعد تلاشی کا روائی شروع کی گئی ہے۔ تے منیو جا رہیو ہے جے حالیہ گندا کھواس گران مانہہ حفاظتی دستاں سنگ ٹاکرا توں بعد یہ دہشت گردنسن مانہہ کامیاب ہو گیا تھا۔

LS Renewable Energy

نوی تے قابل تجدید توانائی غا مرکزی وزیر پربلاد جوشی نے دسیو ہے جے قابل تجدید توانائی غی صلاحیت 2 سو 3 گیگا واٹ تک پُج گئی ہے۔ اج لوک سبھا مانہہ اک سوال غو جواب دیتاں وان مرکزی وزیر نے دسیو جے 115 گیگا واٹ قابل تجدید توانائی نفاذ بکھ بکھ مراحل مانہہ پُج گیو ہے۔ انہاں نے مزید دسیو جے 2014 مانہہ قابل تجدید توانائی غی صلاحیت 74 گیگا واٹ تھی۔ اس ضمن مانہہ اُن غو کہنوتھو جے سرکار نے پیداوار نانہہ بدھان واسطے بکھ بکھ قدم وی چایا ہیں۔

RS PMKVY

حکومت نے کہیو ہے جے پر دھان منتری کُشل وکاس یوجنا غے تحت ہُن توڑی 1 کروڑ 48 لکھ نوجواناں نانہہ تربیت دتی گئی ہے۔ یاہ سکیم 2015 مانہہ مُک پھر غا نوجواناں نانہہ ہنر مندی غی تربیت فراہم کرن واسطے شروع کی گئی تھی۔ راجیہ سبھا مانہہ وقفہ سوالات غے دوران اک سوال غو جواب دیتاں واں ہنر مندی غی ترقی تے عنانکاری غا وزیر مملکت جیانت چودھری نے کہیو ہے یاہ تربیت اُنہاں نانہہ روزگار حاصل کرن مانہہ مدد دے گی۔ اُنہاں نے مزید کہیو ہے پردھان منتری کُشل وکاس یوجنا 4.0 غے تحت نوجواناں مانہہ برقیات، ہارڈ وئر، ملبوسات تے ذراعت سب تیں زیا دہ ترجیح آلی تجارت ہے۔

LS Poverty

سرکار نے دسیو ہے جے مُک مانہہ غریبی نانہہ ختم کرن با رے بکھ بکھ قدم چایا گیا ہیں۔ اج لوک سبھا مانہہ اک سوال غا جواب مانہہ وزیر مملکت برائے شماریات تے پروگرام راؤ اندرجیت سنگھ نے دسیو ہے نیتی آیوگ توں ملی جانکاری غے مطابق 14/2013 تے 23/2022 غے دوران تقریباً 25 کروڑ لوک غربت غا دائرہ توں باہر آیا ہیں۔ جن مانہہ اتر پردیش غا 5 عشاریہ 93 کروڑ، بہار غا 3 عشاریہ 77 کروڑ، مدھیہ پردیش غا 2 عشاریہ 3 کروڑ جد کہ راجستھان غا 1 عشاریہ 87 کروڑ شامل ہیں۔

LS IT

حکومت اطلاعات و تکنیکی صنعت نانہہ مُک غا تتر دو تے تتر 3 شہراں تک لے جان غو منصوبو بنا رہی ہے۔ تانجے اس گل نانہہ یقینی بنایو جاسکے کہ ہر شہری نانہہ آئی ٹی انقلاب غو فائدو مل سکے۔ لوک سبھا مانہہ وقفہ سوالات غے دوران اک ضمنی سوال غو جواب دیتاں واں برقیات تے اطلاعات و تکنیک غا وزیر مملکت جتن پر ساد نے کہیو ہے حکومت نے 65 سافٹ وئر تکنیکی پارک مراکز، بھارت مانہہ قائم کیا ہیں۔ جن وچوں 57 تتر 2 تے 3 مانہہ ہیں۔ اُنہاں نے مزید کہیو کہ حکومت بھارت غا دیہی علاقاں مانہہ رابطو بدھان تے آئی ٹی ہب غا قیام واسطے مزید پہل کر رہی ہے۔

اس غے نال ہی خبراں غو یوہ بلیٹن ختم ہوؤ۔